

Storia di Sabana Grandi



Esaki ta un storia cortico di Sabana Grandi cu ta keda na Santa Martha/Canashito. Canashito mes ta un number deriva for di e idioma Indjan: "Cana-shito" kier meen "Cana poco poco".

Sabana Grandi semper ta conoci pa e siete grafnan cu antes tabata den un cunucu pariba di Tanki di Sabana Grandi. Eynan, segun historia tabatin siete graf traha den forma rondo pero sin number. Di ken nan ta, semper a keda un misterio pa motibo di dos

version diferente. Uno ta bisa cu ta un doño di catibo y su cinco yiunan tabata dera eynan cu a wordo mata door di su catibo pa motibo cu e no a haya suficiente cuminda. E doño tabata Daanchi Nordkop. E otro version ta bisa net contrario cu ta e doño a laga mata e catibo y su famia. Enberdad e tempo ey tabatin algun caso asina entre doño y catibo, auke e esclavonan na Aruba no a wordo trata como tal y nan trato tabata mucho miho cu esunnan na Corsou y Boneiro.

Tambe nos por lesa riba pagina 226 di e buki "Bouwen op de Wind" publica na año 2007, pa autornan Olga van der Klooster y Michel Baker cu ta bisa cu tabatin tres graf di commandeur eynan y mas o menos siete otro den forma rondo pariba di Tanki di Sabana Grandi. Pero nan no ta existi mas door cu e tereno a wordo converti den un cunucu pa planta maishi. Loke mas a haci mi mas curioso ta cu tabatin tres graf di commandeur eynan, pero no tin fecha cu nos por averigua ta cua ta e tres commandeurnan aki cu tabata dera eynan. Mi sa cu tabatin varios graf di commandeur rond den nos barionan door cu hopi di nan a keda biba na Aruba despues di nan termino di gobernacion. Por ehempel, den Santana Protestant semper ta ser bisa cu tres ta dera eyden, esta Jacob Thielen; Johannes Adriaan de Veer y Jacobus Jarman Jr. pero den e investigacion aki mi a bin haya sa cu tin un otro dera eyden tambe, esta Johan Frederick Waters Gravenhorst cu a goberna entre 1827-1833. Jacobus Jarman Jr. cu a goberna entre 1848-1859 tabata e prome gezaghebber di Aruba pasobra e año cu el a tuma over, tabata net e año (1848) cu e number di Commandeur a cambia pa Gezaghebber. Un gezaghebber cu su vision tabata pa traha duro pa hisa e nivel di e luga cu yama Aruba. Pesey tin un number di caya na Brazil cu yama Jarmanstraat, unda mi mes a biba pa varios año. Tambe tin Jan van der Biest cu ta dera den santana na Hato.

Si nos bay bek den e storia di doño y catibo tin un storia interesante di Vader Piet, un Hulandes. Dia 21 di april 1829, Aruba a keda sacudi door di e asesinato di Pieter Lampe, di mas o menos 75 año di edad, un comisario di districto dos, kende tabata biba na Fontein. E tabata yiu mayo di Hendriks, kende a bira e patriarca (stamvader) di e famianan Arubiano. Riba e fecha menciona, su mesun catibo, Gerard, un homber colo scur, a mat'e. Na prome instancia hopi a kere tabata

durante piscamento el a cay for di baranca. Pero ora nan a haya e cadaver den un spilon, nan a bin haya falta di su prenda di oro cu semper e tabatin bisti. Mesora nan a sospecha cu ta su catibo a mat'e. Dia 24 di mei 1829, durante huicio, Gerard a admiti cu el a mat'e cu palo. Gobernador a mand'e Corsou y dia 30 di juli di e mesun aña den presencia di un pastoor catolico nan a horc'e. For di e tempo ey, e luga a haya su nomber di Vader Piet. Aki ta unda na aña 2009 gobierno a cuminsa instala molina di biento.

Dufi Kock

Escritor y Historiador

Savaneta 125-F

Tel: 584-1201

Cel: 592-9417

dufikock@gmail.com

Lid in de Orde van Oranje Nassau 2006